

四庫全書

集部

欽定四庫全書

盤洲文集卷十八

宋 洪适 撰

內制八

六月朔日蝕祭太社祝文

伏以累三光之明震驚涼德修六官之教寅畏格言式
遵伐鼓之文敢潔用牲之告

陰雲不見祭謝太社祝文

伏以季夏之朔太陽有青側身修行未燭其咎雲陰忽興不見薄蝕惟神敷佑敢薦忱誠

修整太廟大殿屋脊及東廊奏告諸室祝文

伏以積雨建瓴太室穿漏載新茨蓋已集工師涓日之良執籩以告

祭告土地祝文

伏以暑雨盈旬廟瓦毀落乃練時日鳩工繕修神其相之以底終吉

南郊奏告天地祝文

伏以慈闈有命凜乎基業之承陽律惟時肇此郊丘之薦報二儀之貺施敕百吏之虔共先事貢誠彝章踵故

南郊奏告太社祝文

伏以禮大南郊甫嚴祀典饗行八牖用報神休方誕告於先期敢絜修於明薦

南郊奏告太稷祝文

伏以禮大郊丘甫嚴祀典祠修官稷用報神休方誕告

於先期敢潔陳於明薦

南郊奏告宗廟祝文

伏以受命慈闈承祧累歲始行郊燎之禮將薦廟饗之誠已戒前期敢伸虔告

南郊奏告太一宮十神太一祝文

伏以祀有多儀事尊肆類已諏穀旦誕播札書徼福貴神告虔嘉薦

南郊奏告安穆皇后祝文

伏以三歲一郊累朝故事御圖之始初講彌文欽惟淑
靈監此豫告

南郊奏告安穆皇后攢宮祝文

伏以迎休圭景展事觚壇已降札書聿嚴柴燎顧瞻園
寢先告吉蠲

南郊奏告南嶽南海南瀆東瀆祝文

伏以祀著邦彛禮尊郊類候一陽于六律秩羣望之百
神告此前期厥惟故事

郊禮修飾太廟奏告祖宗祝文

伏以禮講觚壇祭先宗祏風雨久侵于墻祀斧斤將易於棟楹茲卜日以告遷覲在天之委祉

郊禮修飾太廟權奉安祖宗神主祝文

伏以工役已具日時旣良迺被齋房奉移遷主仰蕲昭假少迪安寧

郊禮修飾太廟奏告安穆皇后祝文

伏以郊丘之祭宗廟必修易腐撓之榱椽治頽穿之墻

壁動茲斤斧告以豆籩

郊禮修飾太廟祭告土地祝文

伏以郊祭有期繕我太室揆日之吉或斷或圻維土有神監典茲役

太廟修飾畢工告遷神主還室祝文

伏以載新廟寢已訖工徒諏令旦以陳籩奉靈祚而反
祐顧瞻在上昭假無疆

太廟殿室畢工奉安祝文

伏以郊柴不遠廟祿為先迺修觀德之宮仰迪寧神之

祉奉安之吉潔告惟虔

別廟告奉安之吉作音蘇如在

郊祀前二日奉告太祖太宗配侑祝文

伏以肅壇時之嚴禋甫迎至景推祖宗而昭配

續改作卜壇時

于上辛式遵故事推祖宗而並侑

誕舉彌文大報有期先事而告仰祈

右序用相休成

太廟祝七祀祝文

伏以卜郊展報假廟薦芳祭咸秩于百神禮先行于七

祀靈光來格熙事備成

分祭太社太稷祝文

伏以土穀大神生殖之本茲伸吉報于國之南刺豕封
羊壇有籩俎來假來享匪今斯今

土正勾龍氏后稷氏祝文

伏以惟神之靈配食社稷土爰稼穡實尸其功練日報
天子郊用牡美芳嘉薦用迪孚休

郊祀奏告五嶽祝文

伏以穆卜天正

續改作夏正

將郊上園崇嶽我我吐符作鎮

敢徵眎施濟此明禋

又四瀆祝文

伏以郊丘之日曾不三旬

續改作兼旬

有赫瀆祇靈光如在

敢徵陰相俾訖嚴禋

改郊奏告天地祝文

伏以秩元祀于觚壇初伸大報候初陽于嶰簫將講盛儀會邊禋之不寧懼齋心之有闕惟藝祖邂逅晦之日

至太宗行上辛之郊禋此前規卜之首夏覲乾坤之錫
祉使疆場之銷兵庶竭忱誠遂成熙事

奏告宗廟祝文

伏以郊類有期邊塵遽起仰遵祖武改卜長贏之初敢
覲神休克展泰元之報

安穆皇后祝文

郊禋有日邊事忽興憲我前規改之首夏欽惟英淑有
以相之

安穆皇后攢宮祝文

始被神丘將嚴大報會邊隅之有警恐齋戒之不虔遵
改卜之舊章覲如存之陰相

前一日輓祭嘉會門神祝文

伏以郊柴在辰皇輿夙駕兩軹之祭昔者有儀于豆于
登取羝以薦惟神擁右安行玉蚪

郊祀日分祭九宮貴神祝文

伏以受乾坤之降嘏合丘澤以薦馨爰修蒞藻之誠用

叩飛棊之時冀垂沖監獲歲上儀

敵人犯邊用兵奏告四聖五嶽祝文

伏以敵國犯邊尚肆虐劉之虐師徒駐野未收攘卻之功敢布忱誠仰干英鑒陣雲如馬雖氛祲之結蟠社鼓用牲異威靈之佑助假公山草木之力成京觀鯨鯢之封

奏告顯應觀旌忠觀吳山忠清廟祚德廟祝文
伏以敵人犯邊迨茲踰月介冑暴布未有成功虔露忱

衷祈于祠下仰祈神相早遂驅除如公山草木之靈建
泚水風聲之績

仲秋薦獻安穆皇后祝文

伏以時及蕭辰祭修園寢顧瞻咫尺想念平生薦此芬
馨歆吾誠意

郊祀前二日景靈宮分詣奏告中後殿祝文

伏以迎日之吉事天益虔

續改作履端之
始卜日用辛

祭必有尊祇

見發祥之祖禮非敢後分遣侍祠之臣望矣孝熙右茲

裡祀

景靈宮天興等殿孟秋朝獻祝香文

孟秋屆候法駕親臨恭焚寶香供養聖祖天尊大帝伏
願祀事崇成神休來萃奉慈宮而同慶躋壽域之咸寧
恭薦苾芬載申頌禱稽首歸依無極大道

壽聖太上皇后生辰功德疏文

伏以祥開長樂迓載風之嘉辰教演真筌起無涯之勝
福具嚴沖式益介慈齡壽聖太上皇后伏願淵覆護持

神光臨燭鮐背鯢齒慶壽母而永歌象服翟衣偕天王而難老

秦光大長公主出殯祭文

惟靈天津稟瑞帝渚騰輝蘭行桃姿女圖章灼采繁采藻婦職無虧問我諸姑介然遺老災生寶婺壽不百年迺瞻素帷無從出涕卜兆有日夕奠是陳尚其顧歆寄此悲惻

皇帝閤春帖子六首

其一

藻景升暘谷條風拂紫宸只今天一笑萬物總為春

其二

嶰律春灰動青陽奏雅音上辛元日是郊類合天心

其三

閏接殘年臘春留半月冬雪深田易墾歡喜匝三農

其四

寶勝新幡下九霄千官接武趨春朝玉卮上壽慈顏喜

歲歲年年舜事堯

其五

挽得天河洗塞氛
非煙協氣作新春
使車已動兵車息
活却生靈百萬人

其六

退朝講武與修文
何暇尋春到玉津
桃李不言渾望幸
從來未識屬車塵

皇后閣春帖子五首

其一

雪放梅粧出風嫌花信遲發生皆帝力載物本無私

其二

池面冰漸破潛魚聖得知倚欄觀綠鰖流荇欲參差

其三

君王盛德卻紛華六寢蛾眉不好奢曾從芝軒看芝草
爭來椒壺頌椒花

其四

栽紅翦翠不為難
開盡千花頃刻間
德壽宮中雕輦駐
慶雲深處彩衣斑

其五

葱葱瑞靄騰椒掖
漠漠仁風扇葛覃
四海預應期樂歲
六宮今已喜先蠶

隆興二年南郊鼓吹曲

六州歌頭

嚴更永
今夕是何年
玉衡正鈎陳
粲天宇
起祥煙
協風

應江海安瀾重規仍疊矩聖主乘乾堯授舜盛事光前
稱壽玉卮邊三年親祀一陽回律八鄉承宇

續改作瑞
杓東轉上

辛卜 觚陛紫為壇仰天顏齋居寂誠心肅禮容專存鍾
石約興衛五輅不求全聽金鑰虎旅無眠儼千官須期
顯相嘉邊一人儉德動天淵費減大農錢神祇格宗祧
燕人民悅祉福正綿綿

十二時

庭有燎疊鼓鳴鼉更問夜如何信星彪列天象森羅虞

旦闕宮畢觴清廟漿拓尊犧繼猗那嘉頌可同科
扈聖萬肩摩飭躬三宿泰時縟儀多丘澤合嶽瀆從曦娥神
光燭雲車風馬芝作蓋玉為珂奉瑄成禮燭柴竣事休
嘉殽隱丹闕湛恩波共願乾坤隤祉邊鄙投戈覆盂連
瀚海洗甲挽天河欣喜色長遇六龍過泰雲和三脊
薦嘉禾

奉禋歌

吹葭縷籥氣潛分雲采宜書壤效珍長日至一陽新四

時玉燭和勻

續改作青陽振蟄氣潛分仙掌非煙壤物效珍年勝舊日逢辛四時玉燭初勻

欣欣造化轉洪鈞郊之祭孤竹管六變舞雲門自古巖
裡犧牲具粢盛潔豆籩陳袞龍陟降幣玉紛綸徹高閭
靈之旂神哉沛排歷崑崙九歌畢盈郊瞻樛燎斗轉參
橫將旦天開地闢如春清蹕移輪闐然鼓吹相聞藹祥
雲驪臚八陛釐迓三神聖矣吾君華封祝慈宮萬壽椒
振多男六合同文

右三曲巖更警場作

降僊臺

漏殘杵靜雞聲遠到高燎入層霄雲裏蟠瑞靄天步下
嘉壇旗旆飄搖黃麾列伏貔貅整氣壓江湖導前從後
盛官僚玉佩間金貂望扶桑日漸高陰霾霜雪底處不
潛消輦路祥飈披拂絳紗袍雲間端闕仰岩堯播春澤
喜浹黎苗禮成大慶黿三抃受昕朝

右一曲禮畢皇帝降壇作

正宮導引

重華天子長至

續改作
秦時

奉神虞九奏會軒朱星暉雲潤

東方曉拜貺竹宮初歸來千乘護皇輿瑞景集金鋪雞
竿高唱恩書下惠露西中區

右一曲皇帝還宮作



盤洲文集卷十八

欽定四庫全書

集部

盤洲文集卷十九至二十一

詳校官庶吉士_臣初喬齡

主事_臣呂雲棟覆勘

總校官編修_臣王燕緒

校對官中書_臣李斯咏

謄錄監生_臣譚世緯

欽定四庫全書

盤洲文集卷十九

宋 洪适 撰

外制一

錢端禮兵部尚書都督府參贊軍事制

武部所掌五兵文昌甚高八座必望實素諧於輿論則
登用可彊於本朝具官某敏識炤微清才露穎渾金璞
玉備和氣於四時錯節盤根發新硎於游刃自騫禁密

獨步版曹因邊祲之究懷以皇華而諭指宣勞半歲揆
策萬全借前箸籌之明於料敵賢長城遠矣賴以折衝
茲遣使以結盟尚整軍而修備已開督府命將相以視
師乃陟夏卿率賓寮而欣畫共講止戈之武以凝奠枕
之勲往服恩榮益肩忠報

張宗元司農少卿制

國家駐蹕東南宮禁之須百官之奉師兵阜隸之食皆
仰給於大農近郡新有水害朕已蠲民田租慮倉庾或

不能足用也以爾出自勲閥以材譖稱卿寺計臺所居
可紀茲用命爾掌九扈之事爾當會其多寡常使有餘
則為稱職不獨謹出內而已

韓彥古將作監丞制

朕留意武事凡將相功臣之世皆欲羅而致之以察其
可用爾好學不怠秀于其家匠監美官吾所不惜往思
振職毋或負丞

向洵提舉淮東常平茶鹽制

山澤之產所以供邦財者不一而鬻海為之最淮浙閩
禹瀉鹵之地不一而淮東為之最使者非其人則國有
遺利爾材健而通老于吏事把麾揭節良有可觀鹽筴
之柄茲以付汝于官吏則有澄清之權于民又有常平
之政往哉無瘵曠厥職

知盱眙軍郭淑直秘閣制

爵祿天下之砥石也有勞必賞能者斯勸爾材智闡敏
遇事風生一障之乘弗憚險易視探虎穴如行坦途列

職道山旌汝體國

權劍門縣杜養循資制

王師出塞以食為急爾千里餽餉軍不乏興進秩之榮
用荅勞効

趙密落致仕權殿前司職事制

賜安車而就第甫遂高懷護鉤戟以周廬仍尋故步人
既諳於要求朝有賴于誰何具官某氣略沉雄智謀宏
遠藝長弓劍出山西六郡之家學守韜鈴得濟北一編

之法久掌禁門之衛浸高盟府之勲會疆戍之移屯致
巖除之缺帥疇咨在列毋易老臣以黃髮而治兵見赤
心之許國式崇武節可壯軍聲噫漢室置羽林之官蓋
仰侔于乾象唐人有靈壽之賜亦復總於師干益勵忠
規用酬恩遇

龔茂良太常少卿制

奉常居九寺之首繇法從而下亞卿冠乎庶寮秩清而
選甚重况當始郊之年稽古禮文之事豈易屬人爾學

深淵緼溢為文華儒黨所譽素有直聲廼自六察寘之
諫坡庶幾辱聞骨鯁之論而獲拾遺補闕之益也引嫌
辭位屢挽不留陟之容臺以觀遠器

給事中吳希轉左朝議大夫制

寄祿之階二十九等有限年無限負獨議大夫其數八
十搢紳之士官極乎正即望之而不能至唯侍從則不
拘此法可以超軼而居之具官某直繩聳乎霜臺惠露
洽乎三郡華問瓌望靡人不知再上禁途尊我朝著茲

以黃扉之權而秉軍旅之事固不以一秩為軒輊也有
司校考寔應逸品出此言綽為之寵光

忠訓郎戴青降一官制

馭軍有律亡命必誅爾逋逃自歸姑從末減尚思後効
戒此薄懲

魏勝轉右武大夫忠州團練使知楚州陳敏轉
成防禦使知高郵軍制

朕差擇猛士扞城四方邊最有聞豈緩褒典具官某忠

義自奮驚勇可推典治新邦閱日滋久控制外侮軍聲
甚張招攜流通績効亦著易守淮壘謹吾藩籬用陟戎
團仍超橫列陳敏作用陟兵防書之盟府當思民社之寄不專軍旅
之容內撫疲氓遠固疆圉恩威相濟時乃之休

鎮江府後軍統制胡明轉武經大夫制

爾將心遠邊久佐新壘招攜控制勞効居多增秩之榮
用勸同列

知漣水軍夏俊轉武節郎制

爾忠義奮發有志功名一障扞邊備宣勞効是增命秩以夸轅門

軍時秘書王東里著作佐郎戴達先莫冲校書郎制

冊府儲天下之材如梗枲豫章積日累月俟其昂霄聳壑然後擇而用之爾等學行純淑選在周行或自簿領而徙清官或仍筆削而佐太史或繇是正而進校讎併肩羣居相與言仁義之道而窮未見之書益尊所聞以

涵遠業

吳飛英太學博士制

愛其子擇師教之國家為多士選模範烏可忽也爾頃
游膠庠名出同輩推其所得不倦於誨人則有速肖之
効矣

蘇峴太常寺主簿制

爾四世祖精於禮學作太常因草書百篇行於世禮官
有討論資以折衷而無聚訟之患爾不墜家學近臣稱

之往游曲臺思贊其長

揭陽縣令余致和廣德縣令趙善禮循資制

國家除戎器以藏武庫嘗下諸郡作甲爾能勤其官先期趣辦爰進一階示信賞也

唐閔都官負外郎制

六官之屬二十四司事有劇易而郎位應列宿等耳爾學韜於中入朝久次陟之省戶俾究所長昔薛能李頻嘗為中都郎而官曹增重其思古人以稱推擇

知樞密院賀允中贈三代曾祖心田員外郎贈太子少保應機贈太子太保制

君子之澤五世聿流積德之光泰階所陳六符斯厚顯親之典茲延登於碩輔復追賁於曾門具官某探道有涯懷材弗展傲青雲而吏隱甘白首之郎潛餘慶所覃後昆益大恩加愍卅已陟東宮之孤寵逮幽局更增一品之秩尚其冥漠歆此休嘉

曾祖母和義郡夫人楊氏贈同安郡夫人平樂

郡夫人侯氏贈文安郡夫人制

百川之水其源深者流必遠昂霄之木其根茂者枝必盛輔拂股肱之臣享高爵厚祿而有英聲鴻實者皆其先世垂光委祉之效然也某氏鍾禮郝法宗姻化之克配吉人慶延後裔副笄翟茀載啓大邦庶幾泉扃知此愍飾

祖朝議大夫贈少保撫辰贈太保制

昔于公治獄多陰德乃高大其閭門令容駟馬高蓋車

謂後世必有興者其子孫踵相躡為三公天之可以責報如此其官某被服儒術策名鼎科澤加於民僅躋卿位非此其身施於再葉宥庭政路赫赫巖瞻寵及九原進升公保營魂不昧尚克享之

祖母嘉國夫人王氏贈蔡國夫人制

朕三聘老臣再登政地宏模偉業既奠鞏于邦基卹典綏章必寵光其祖廟某氏勤組紉之事服圖史之箴溫慈惠和稱於宗黨蕃衍盛大燕及閭孫位既峻於台階

恩益崇於王母小君惟舊大國始荒申加刻蜜之封用
展含飴之報

父承議郎贈太子太傅坦贈少傅制

人子之事其親常懷三釜之養大夫之祭於廟遂伸五
鼎之儀惟時儒先復陟台輔孰慰循陔之孝爰推告第
之恩具官某種學績文道潛乎聖域砥節礪行名振乎
俊躍敘六駟以卑飛儕百僚而漫仕是生英傑胥會明
良運機籌于帷幄之中贊政化于陶鈞之上積善必得

其報教忠厥有自來幽夢甚光登春宮之傳職愍章相
繼榮左棘之新名尚其如存歆此無數

母太原郡夫人王氏贈賀國夫人制

朕考兒齒黃髮之章見奉親之燕喜誦凱風寒泉之什
知鞠子之劬勞常優錫類之恩用達揚名之孝矧吾樞
極永愴栝棧寬其霜露之思寵以山河之象某氏性專
靜懿德稟柔嘉婉厥名儒采藻謹宗祊之薦誨其哲嗣
斷機擇師友之賢暨再應于台符徒有懷于甘旨從夫

之氏有國在南乃開紫誥之封尚作黃爐之飾光靈不翳休寵是歆

妻永嘉郡夫人鄧氏贈吳政郡夫人制

自古士大夫以詩書起家踐于丞弼非獨祖考燾後之社也蓋亦有壺內之助焉某氏胄出名門輔佐君子柔德淑範齊芳管彤饋祀有年不克偕老已正魚軒之貴具膺鸞誥之榮改昨大邦式賁泉壤

范榮忠州防禦使制

朕記人之功惟恐事同而賞異師還遠徼可無飲至之
恩乎具官某登鋒履刃衆推拳勇誓川扣楫有志古人
比總舟師往臨海道扞禦外侮威聲甚張歸休淮濱未
忘武備班勞出綽用進州防益思奮忠以荅殊獎

王選高州刺史制

胸山之役累月交兵猛士登陴乘機戰野摧陷強敵

名御

清重圍守將之功爾居其最茲出褒典寵以州旗益思

竭忠用答恩獎

郭剛達州刺史制

日者勁敵窺邊薄我瓜渚爾輸忠賈勇誓掃兵氛陷陣
卻敵厥功茂焉遙領州符茲為醲賞益圖衛社以保榮
名

徽猷閣待制周執羔封贈父朝奉大夫致仕庭
俟贈右朝請大夫制

朕嗣服之始慶覃中外禁近之臣時方端憂則俟其御
祥琴而推禰廟之澤所以教天下之孝也具官某盛德

著於州閭美名馳于仕路一經教子入從出藩黃髮
眉享其榮養新阡屬耳禔典鼎來追命文階用光廟祀
母宜人吳氏贈令人制

婦人從夫與子而貴夫為大夫子為卿夫存則封邑不
可踰其爵今亡矣故視其子無嫌也某氏徽柔莊靖夙
著壺彞三徙其隣克成賢嗣降年不永板輿養闕宜家
美號昔繫其夫聖善令名茲因其子推此協華之澤慰
夫念母之心

繼母宜人劉氏贈令人制

朕覃踐阼之澤于四海靡間存沒况從臣之親乎某氏
出自名族嬪于儒門馴德淑行六姻所稱有子通顯伸
其孝思重泉有知歆此祕典

劉大辯大府寺主簿制

朕比下省官之令雖中都亦去冗員故九卿之屬丞簿
不並置惟司府兩丞亦得以簿代之蓋職掌文書之繁
俟人而後舉也爾以儒術決科好談古今治亂事勾稽

之任姑試爾才益撫所長以若予采

度支員外郎吳嘯陞郎中制

在廷百官惟尚書郎以資歷淺深而為之別若身登省戶則疇昔歲月雖分陰不棄也爾少有雋譽久于剴繁司度劇曹甫觀所蘊爰稽官簿當應星文服此寵榮益思自勉

商江等贈官制

爾等奮發忠勇氣吞大敵力戰喪元名則不朽寵之命

秩式表重泉

賀允中資政殿大學士致仕制

出而謀國老成厥有典刑退則潔身君子所期明哲惟
時碩輔復返故山乃發渙章以先行李具官某志驕富
貴行中表儀強識博聞學周公仲尼之道同工異曲有
相如揚雄之風蚤踐禁涂進聯政路結眷知于太上猶
膏澤於域中凡造膝之所陳或嬰鱗而不避朕有懷耆
德迎枚乘以蒲輪以壯本朝坐子房於籌幄淵然素縕

卓爾遠猷所賴股肱之良豈拘筋力為禮覽封章之相
繼納祿賜而欲歸念踰七望八之年憇勞以事圖咸五
登三之治重惜其行勉遂初心用還舊物特款清間之
燕式全體貌之恩噫終始三休不改赤松之樂古今一
揆莫難黃髮之留尚期存闕之忠無廢憂時之論益顯
頤養永介壽臧

李進右武大夫制

瓜渚之役敵勢方張儻非梟俊之臣孰建盪平之績具

官某精忠自誓勁勇不羣擐甲執兵蓋將死敵塞旗斬將有以安邊旣掃機槍遂全壁壘宜陟橫階之峻用增尺籍之光益務捐軀以酬恩渙

吳芾吏部侍郎制

中臺六職小宰之列甚高選部三銓右班之事最劇欲抹放紛淹滯之失須得嚴勁詳明之人克允僉期時惟邦傑具官某學足以適先王之正識足以燭天下之微頃獨步于臺端茲再儀于禁密批敕如風霜之奮纔見

一班執政有瓜葛之嫌
艱陳三至方賴回天之助
勉從易地之除
大振紀綱
盡資藻鏡
草此舞文之弊
副吾立武之心
益崇令名以對殊遇

陳俊卿知泉州制

閩粵之區
泉南甚大
儻非慈惠忠信之長
曷繼中和宣布之詩
茲得其人
無媿于古
具官某
器範夷雅
議論通明
蚤登鼎科
休有華問
振紀綱于憲府
妙言語於綸闈
頃畀是邦
以疾為解
顧左符之久闕
申前命而復行
旣

里社之相鄰宜民情之素習當勵維良之政慰其來暮
之思

王槐孫趙士楊友循資制

西師出塞屢奏膚公爾奔走供軍前後無闕班勞進秩
服此寵休

呂擢直微猷閭知建康府制

長江古為天塹建業今作陪都非智略輻湊有兼人之
長者不足以稱方伯連率之職爾才具縱橫馳聲州縣

盤根錯節迎刃有餘名對便朝信其可用乃躋延閣超
畀麟符夫高牙大纛掌我北門之管其望甚重地居水
陸舟車之衝一都會也其事甚繁內有熊羆七萃之所
屯外有扞防疆場之所係其責甚大惟剛柔相濟施置
協中則可以無過舉而有能名勉之哉勿負予飾擢之
意

保義郎閻揆降一官制

大治至行在所纔二千里爾部督綱舟私輒貿易所過

逐利踰年始來姑鵠一官服我輕典

敷文閣直學士王大寶轉一官致仕制

閔勞以事朝廷施優老之恩歸絜其身君子具遺榮之美式遂雅志用增令名具官某養氣至剛逢原有要瑞於鱣水世謂間生策之龍墀士皆斂避久邇迴于外服晚馳驚于禁途得難進易退之風鑒倒行逆施之迹夫引年知止所貴乎近臣稱疾旬休曷虞乎清議茲披來牘盡出至誠俾陟文階以娛里社光爾桑榆之景視茲

綸綍之言

李益謙戶部員外郎制

國家養兵之費浸廣取財之路難增欲不益賦而用度足故地官甚難其選雖大小司徒心計於其上而為之屬者可不擇哉爾學有淵源行中規矩久于外官吏事甚習便坐賜對詳整可采郎官上應列宿躋次而進當思有以助其長則予汝嘉

盤洲文集卷十九

欽定四庫全書

盤洲文集卷二十

宋 洪适 撰

外制二

徐嘉知紹興府制

千里之內曰畿去天則通十國為連有帥作牧非輕弄
印踰時出綸示寵具官某襟懷夷粹問學精深再登表
著之班備見論思之益強兵犯塞仗使節而敢前大郡

承流惠民編而不擾顧稽山之巨屏拱狩岳之行都事
簡而有常俗醇而易治為吾鎮撫賴汝慈祥當蹈烹鮮
之言靡須束溼之政往哉夙夜對以春秋

尹稽石諫議大夫制

予違汝弼古存五諫之名君明臣良斯振七人之職長
茲言路尊我公朝具官某操絮氷霜識倂著蔡蚤陟小
坡之列浸高橫榻之班殿上青蒲獲補闕拾遺之益人
中屈軼擅觸邪指佞之聲以仁義而竭誠不沽激以干

譽從容接畫慷慨憂時說必可行事皆有據積此臺端
之望峻其庭諍之權人主亦有逆鱗孰云難犯忠臣謂
之骨骸無戒太剛益勉清埃以伸正道

晁公武侍御史制

御史府風霜肅然遠近望而畏之南牀最為雄劇非修
絜方聞之士寧刻印而不予也爾貫穿古今通達治體
久勞于外事無不歷入朝三接滿歲九遷諫紙臺評飽
問輒論憂時謀國具見公忠禁路乘驄孰曰不可善善

惡惡益期盡言副我虛懷以休廣譽

參知政事王之望贈三代曾祖遷太子少保制

士有積善于身播德于鄉而國有爵祿不霑於生前則天之報施宜施於孫子具官某清塵美行肩于古人重

義輕財

缺

訟州閭以無怨公稱之我宋造邦穀城

以進士起家自其孫

缺

迨茲三葉贊我萬幾流澤燾後

信可取必春宮三少用賁重泉靈爽未淪服此嘉數

曾祖母向氏始興郡夫人彤氏永嘉郡夫人制

國家之制官登朝列則寵及其父母一二股肱之臣乃得追榮于三世蓋德厚者流光德薄者流卑也某氏歸于儒門允蹈女憲令儀令德詒燕聞孫陟乎泰階增賁廟祀彫軒象服裂以名邦音徽不遐知有慙冊

祖石朝奉郎文太子少傅制

臧孫有後于魯管氏世祀于齊考于古而驗于今豐其德則腆其報具官某抱道不展積行在躬居鄉高月旦之評誨子有羸金之訓惟今碩輔乃爾孫枝爰推飾壤

之恩以慰顯親之志亞於儲傳篆此蜜章明靈如存益
昨具慶

祖母安人黃氏昌元郡夫人制

朕延登邦傑進穆政塗式資康濟之材以成調一之効
爰申閔典用侈大門某氏婉靚凝姿溫良賦德克謹蘋
蘩之薦率循珩珮之和教子始登于儒科有孫遂參于
鈞軸積善之報垂榮無窮茲疏象掃之恩以示松區之
寵光靈不昧尚克享之

父左朝散郎綱太子少師制

天下之為人親者必欲其後致君澤民以踐其詩禮之訓天下之為人子者必欲其身問安視膳以盡其菽水之驪仕而至于三階極為臣之榮可以伸重茵列鼎之養矣而白駒過隙風木興悲顧瞻在堂親不相待非國家優其顯報之澤則亦何以慰孝子之心乎具官某學耕文獲左右逢原破大邑之天荒拾儒科如地芥恬于勢利袖手下僚有子卓然材出儕輩贊我為政倚之中

興副其追遠之思申以閔祿之冊官師之亞班品甚崇
九原有知歆此無數

母碩人張氏清河郡夫人制

朕卧薪嘗膽思報朔庭謀皆予同時有人傑登之政地
資以興邦宜申告第之恩以顯擇鄰之訓某氏母道慈
篤閔風靚專儷德名儒騰芬姻戚惟爾哲嗣作我大臣
嗟黃髮之不遐使萬鍾之弗泊祿之翟弗賁及泉扃遺
懿猶生卹章是寵

妻令人張氏咸安郡夫人制

詩首二南鵲巢詠鵲鳩之德權分六服黼衣參禴翟之
華惟公侯有開國之尊故湯沐以從夫為貴某氏儀度
嫺雅性資惠明婉于儒宗有夙夜相成之益相其時祀
竭春秋匪解之誠壺則甚章嬪風可法既宜家而偕老
見得路以躋榮茲疏大郡之封以正小君之位其祇茂
渥益廣淑聲

考功郎中沈度直祕閣知平江府制

吳門介藩密接行闕異時持橐之臣乞左符而不可得
爾以名字典郡威而不猛刃遊肯綮庭無逋事題輿是
邦厥有遺愛輟自省戶寓直道山用增森戟之重凡惠
民戢吏聽訟理財之事不待丁寧之訓也惟枕江連海
戒于外虞監牧之政營屯之寄所以寬我民食者爾尚
勉之

何熙志御史臺檢法官制

朕寄耳目于御史府疇咨時望以長風憲又使其舉所

知備察案所以叅論議廣聰明公是非也爾博物洽聞
蒞官得譽御史以爾為蜀士之秀朕信之不疑俾爾接
武霜臺以俟簡拔非曰從事三尺法而已

沈清臣太學錄制

賢士之闡教法有掌譽非素著衆豈心服爾通經術嘗
歷校官宜居學職振我序音

起居舍人李南壽直秘閣官觀制

士大夫足入中都則患得患失不知去朕甚病之爾學

問該洽嫻于文辭示我周行滋有華問立螭簪筆其地
甚要典朕三禮行且為真雅意一丘銳然勇退瀛州寓
直休以叢祠益裕器業以俟妙東

陳大年循文林郎制

戎事既興邦有賞典爾能以輯濯助我邊防增秩之榮
用以勸衆

李詰贈奉議郎制

爾齋恨泉下嘗有卹章鄉邑陷蕃不復告第王師闢土

有子自言復出絲綸尚其敬服

錢宗俊承信郎制

富者嗇財一豪不拔爾能捐私積佐急公上登名右列
為爾之榮

歸正官張彥循儒林郎制

爾久淪異鄉心在王室糾合義士分梨偽官幡然來歸
宜有褒賞益思策勵以荅恩休

虞允文端明殿學士同簽書樞密院事制

文武之憲萬邦政克符於二柄帷幄之籌千里象實並
于三階明良所由賡歌夙夜以之基命我有峻德諧于
僉言具官某挺昂霄聳壑之姿抱斂鍔淬鋒之器前言
往行發為議論之英大冊高文兼得典謨之體昨當牛
渚之役獨勵戈舡之師一掃兵氛微管仲民其左衽再
開幕府用李勣賢於長城旣邊瑣之周知殆戎弢之暗
合夕烽報警清蹕戒嚴惟本兵式賴于傑材則料敵無
逃于沉畫俾贊宥地共寧慶基噫齊有晏嬰遂獲折衝

之效漢得汲黯可寢發蒙之謀益務交修勿令專美

錢端禮端明殿學士左通議大夫簽書樞密院
事兼提舉德壽宮制

天子守在四夷所貴禦敵之策公輔間于兩社均為執政之臣厥任不輕非賢罔入具官某富淵源之學有夷雅之風獻納論思久掌民曹之計發縱指示嘗顯莫府之權諭軍致鳧藻之和料敵若著龜之智言皆可復忠在不欺朕德媿協華志期繼伐問安視膳欲伸天下之

歡分職設官當建宮中之使若稽祖武歷選臣憐乃籌
經武之英俾贊本兵之重庶仰司于慈禁仍外折于遐
衝賜以賢科循夫故事噫刷會稽之恥必以范蠡為師
寢淮南之謀是資汲黯之力益思長轡同穆丕機用酬
倚重之心斯廣無窮之聞

魏勝贈節度使制

執干戈而衛社有

缺

之勲援枹鼓則忘身果殉死

綏之志特峻齋壇之錫用高盟府之書慰厥營魂渙茲

恩冊具官某心思英偉膽略驍雄幕中興銳將之名有

橫挑強兵之計

闕

誠而歸義立漢幟以成功易子析

骸能堅

闕

鍛甲砥劍遂換山陽之符會敵國之

窮兵出清

闕

犯境中流斷絕大振蒙衝之威廣野交

鋒獨賈蠶弧之勇期戎麾之電掃驚武帳之星沉嘉爾
盡忠為之屢歎神旗豹尾更增廟食之榮羽林孤兒庸
侈門賁之澤諒其精爽歆此恩休

張全贈拱衛大夫防禦使杜斌贈拱衛大夫圖

練使李庠贈左武大夫團使制

羽林拔距夙馳勇鷙之聲馬革裹尸共惜奇厯之逝爰
推卹典用尉營魂具官某材氣沉雄機謀超邁結髮殆
更於百戰治軍俱合于六弋名旣冠于棘門勲浸書于
盟府欲執俘而繫鼓寧盡敵以死綏嘉爾孤忠為之屢
歎斷匈奴之臂莫遂壯圖歸先軫之元空懷偉烈用崇
橫品仍列遙防

杜弼李庠
並作遙圍

尚其英靈知此愍飾

知漳州王晞亮祕閣修撰致仕制

年至遂老乃丈夫之常夜行不休亦古人所戒厥惟持
索之彥豈復挂冠之拘爾抱器甚高策名茲久偃儒紳
而蹈景參嶰律以含和再入京華遂騫禁密靖共爾位
嘗馳封駁之聲疇若予工備罄論思之益一麾去國五
綉宜民踵知止之高風上遺榮之需牘畀以論譔之職
諧其燕閒之懷家有安車斯示子孫之寵門施行馬不
妨故舊之游益荷美名以綏壽嘏

王述右正言制

天子有爭臣所以使造膝盡規納君子無過之地中外
大小之臣有不飭其躬不稱其職者又得而糾之爾篤
學有立論議据經守正朕得爾於占奏之間莪冠霜臺
名出人右茲用寘爾于諫省爾其公是公非不吐剛茹
柔以副朕耳目之寄

程叔達監察御史制

憲府有六察不獨檢柅吏姦所以助臺中之評伸天下
之公也爾秉心端夷植學醇正題與天府立政有聲勾

稽栢寺清論所與陟之冠豸茲號要津益思匪躬以俟
甄拔

曾逮浙西提點刑獄制

朕駐蹕吳中浙西八郡之民跬步可至帝城其銜冤負
枉者皆能訴于臺省大則撾鼓投匭不難也部使者材
稱其職則民欣然得其直矣爾學有元本紹其家聲甚
秀而文達于從政曲臺考禮正藉洽聞祥刑擇官畀以
使節非獨寬我憂民之心亦以遂爾奉親之志

王彥落龍神衛四廂都指揮使制

天子執賞罰之柄不可黨偏士卒變勇怯之心在乎激
勸儻逡巡而不進與逗撓者何殊公論旣諠薄懲難廢
具官某蚤推沉鷺遠有風聲由秦蜀萬里而來嶺江淮
一面之寄所期李勣為我長城寧使齊人笑夫百步方
尅日俟濠梁之捷乃望風捨昭關而歸辟易如斯掃清
何賴庸按出師之律少伸退舍之誅屈此憲章鐫其廂
部噫探姑繒之壁當圖盡敵之功復鴈門之跡斯雪非

夫之恥永懷寬典勿負異知

劉寶落節度使制

將士之勇怯視賞罰于朝廷人主有勸懲采是非于公
論衆之所咎朕不可私其官某蚤謂沉雄起之閑廢專
揚楚一面之寄握貔虎六師之權所期固守于金湯可
以坐清于氛祲暨蜂旗之犯塞以闔舸而出淮當守將
鏖戰之未分乃轅門陰拱而不動即以會兵為解輒爾
委城而歸分間如斯防邊焉用庸按治軍之法少伸退

舍之誅用奪齋旄持寬禁罔噫狃蒲騷之役彼方逞于
凶殘復鴈門之騎汝尚追于賢範能圖盡敵之報可雪
非夫之羞勿負深知以崇永譽

惠迪國子博士制

博士秦官也非資稟淑茂道術通明者不足以居之爾
溫故知新可以為師矣晨入成均則詔諸生誨以正心
誠意之學豈止章句文藝云乎哉

吳芾徽猷閣直學士知臨安府制

京師蓋浩穰之地輦轂以彈壓為先威不振則盜賊公
行政之修則紀綱具舉必濟寬之有術斯救弊而無偏
我得賢能使之尹正具官某材見實用學非空言頌違
表著之班疊佩蕃宣之寄發擿隱伏雖銖兩之姦皆知
撫字困窮無尺寸之膚不愛復入文部一清武銓會天
府之闕人稽輿言而出命顧覆車之當戒期奠枕而相
安前有趙而後三王遺風可想昔無襦而今五絳惠露
是宜用副選掄益思幹治

薛良朋直顯謨閣浙西轉運副使制

宇內漕輓皆置使者惟畿部治于帝所有劇繁之事倉猝之須故選材非它道比今水潦之後民艱于食倉庾亦不豐其儲使者得人則可以寬中吳之慮以爾學邃識明長于吏道剖符持節有赫赫名乃輟之省闥任以計臺又寵之以謨訓之直雖爾以田廬姻亞為言吾不以小嫌而妨實用當體茲意勉旃毋忽

朱夏卿權戶部制郎制

四鄙宿兵大農之費益耗六官服采版部之任最難惟得其人而理財則不益賦而足用疇咨在列選擢匪輕具官某稟資既良信道甚篤緣飾兼乎儒雅肯綮發乎新硎入為司稼之卿嘗治供軍之政輸將二浙勞勤累年便朝每納其面陳輿論咸稱其心計惟乃顯考相我慈闈取日虞淵獨高忠烈紬書金匱具載勲庸有賢子之克家見流風之燾後當茲多壘所貴實材超地官筆橐之班揔天下貨泉之柄勉圖振職休于前人

王稽中考功員外郎制

司績大夫掌仕者增秩之政吏或挾拾細故逞其私欲梗之毫釐失之千里以爾挺介特之操有剛嚴之聲乃自憲臺徙之郎位使在選者無沮抑滯留之歎則與明目張膽時無以異也

趙禹閣門祇候制

上閣之職右列所榮莫府以爾馭軍有律宜用旌賞勉思報國無媿恩章

魏郊武功大夫忠州刺史制

漢人取從軍死事之子孫養于羽林教以五兵號曰羽
林孤兒有征伐之役則選用之汝父北首死敵忠勇無
雙汝年雖未冠朕不惜高秩厚祿使汝襲乃父之品金
人者不戴天之讎也其思所以報之

唐堯封殿中侍御史制

天下之是非不公則有諫官御史寄一人之耳目以筆
端挽黜陟之柄若聽之不聰視之不明則白黑弗分而

玉石俱焚矣以爾學為醇儒行為莊士議論正直無所
黨偏主盟賢闕士不踰矩宜執霜簡接武赤墀使簽士
斂衽善良伸氣則朕有知人之哲而汝無負于風聞顧
不休哉

盤洲文集卷二十

欽定四庫全書

盤洲文集卷二十一

宋 洪适 撰

外制三

晁公武權戶部侍郎制

君子言必可行寧為一切之弊洪範食以為首孰明八
政之源時有通儒長於心計詳其說則若折枝之甚易
試以事則豈刻楮而無成往諧地官式蔽朕志具官某

學潛墳索材挺梗柙論思殫造膝之忠謇諤得匪躬之
故綱紀正於轂下措紳畏其筆端自四鄙之多虞或一
日而再召充牣憂時之略科條足國之方論及理財蓋
纚纚而可聽使之治賦會綽綽而有餘與其專憲府而
寄以抨彈孰若貳版曹而究其績用儻以責人而責已
斯能為上而為民即問錢穀幾何可冀貫朽粟陳之効
亦有仁義而已當無頭會箕歛之非用觀遫募以聳興
望

王剛中禮部尚書兼給事中直學士院制

咨四岳能典朕禮孰為稽古之儒俾萬姓咸大王言必
賴綴文之傑仍居批勅之地斯極垂紳之榮具官某材
冠倫魁詞工體要西掖妙清泉之思坤維馳制閫之聲
論道下帷記甘盤之舊學因師獲印邁仲進之前塵名
對昕朝超登內職臨文問諱懼奸祖廟之名辭尊居卑
退就北門之直畀宗伯討論之事兼夕郎糾駁之權稽
首而遜夔龍昔光帝典拊髀而思頗牧今在禁林悉展

賢謨用裨國論

周葵資政殿學士提舉臨安府洞霄宮制

執政其猶股肱所藉弼諧之助大臣斯有體貌况無纖介之嫌惟時碩儒厭參萬務庸出均休之命俾聞知足之風具官某躬上賢之姿究先聖之壺青天白日人爭睹其清明北斗泰山士咸高其景行見謂居今而行古未嘗枉尺而直尋屢入脩門晚騰夷路間兩社而為輔久穆丕機有一言以興邦每陳正道粵自垂垂之警浸

勤夙夜之憂秣馬治兵揆漢室備敵之策豐財積粟講
荀卿富國之篇正賴同寅用圖再造儵爾易退確乎不
移乃隆秘殿之班仍賜真祠之祿終始惟一身名俱榮
噫富貴而歸故鄉自守冰霜之操謀猷則告爾后尚無
金玉其音往企前英益迪華問

鄧王夫人錢氏廣國夫人制

朕以乾德始郊避新陽之近晦永熙故事改嗣歲之上
辛適值邊虞用循祖武雖蕃釐之未受顧慶澤之難稽

錢氏德邁前塵行光內則服禮義之訓飛周篇魯冊之華生忠孝之家參宋子齊姜之盛儷我家嗣驩于兩宮茲推泰時之恩載裂番禺之壤彤管有煒旣婦道之可書翟茀以朝在皇儀而甚美其隆閨範以耀綸章

慶王夫人韋氏華國夫人制

朕初修郊類以戒先庚之期會有塞氛遂移建巳之月迺斂泰元之福預推大青之恩爰舉邦彛式光子舍韋氏儀度嫺雅性資惠和誦周召之聲詩閨風夙講鍾姜

任之餘慶戚畹迤推惟踐履於女圖故章明於婦順昨
之成國易彼舊封佩箴悅而問難鳴益隆孝道如山河
而宜象服克稱德容艷此華章昭于彤史

恭王夫人李氏定國夫人制

朕將燔郊燎偶警邊烽仰憲先猷嘗講上辛之卜參稽
古訓遂改長羸之初雖未逆于神釐爰預行於邦渙李
氏珩璜中節紛悅合儀出英衛之門聽姆教而婉婉歸
閭平之邨成婦道之肅雍嬪嬙譽其淑聲娣姒知其端

操茲徙封於望國猶拜況於泰壇象服是宜庸侈筭珎之美彤管有煒浸揚竹帛之芬往荷華章益綏柔履

張宗卿祕書郎鄭升之正字制

往者大減冗員雖瀛洲學士亦損其泰半茲有乏材之嘆而議者歸咎儲蓄之不廣也閏月甲寅制書始復祖宗之舊宜有望士裒然充庭爾宋卿五領之英冠于賢級爾升之三衢之秀經為人師或別朱紫於麟臺或事雌黃於蠹簡益思涵養以稱僉期

閭安中國子司業制

古之盛帝投戈而講藝息馬而論道今仍年出車邦賦
不足雖養士有費朕不敢惜蓋長育秀異以備他日之
用也爾材美於西州名高於鼎甲戴獬豸冠則羣而不
黨掌南宮牋奏則粲然有文訂五禮之制則是古而不
變非強學力行者能如是乎茲用陟之成均受以師說
必能使諸儒樂循理而有士君子之行也模不模範不
範抑無媿焉

王佐直寶文閣知宣州制

雙溪疊嶂在昔名邦北枕大江南連縣歙諸山守土之
寄所不可輕爾以文學冠于俊躔以治行最於左契久
去柱下重入脩門金華談經發明王道攝空民部會計
盡心上牘再三自請補外大臣多稱其美同列咸欲其
留宛陵之城方謀郡將姑徇所欲寵以奎

缺

其賢嗣擇師友而徙鄰暨榮陟於禁途空永懷於甘旨
茲推慶典用賁幽扁尚妥爾靈益胙其後

故妻陳氏令人制

朕初修郊類已戒先庚之期會有邊氛遂移建己之月
雖神釐之未受豈邦渙之可留某氏毓秀名門婉德君
子柔則肩于鍾郝淑聲軼于姬姜益虔奉嘗不克偕老

錦韜象軸齊眉鬲一見之榮栢冢松阡刻蜜示九泉之
飾庶幾不朽右爾子孫

陳巖肖禮部員外郎制

太上皇帝取祖宗詞學之科新其名更其制始許公卿
大夫之世與登進士第者角其藝而選之爾褒然為仕
子倡坎壈不振人咸歎焉再入郎闡處非其地南宮掌
翰僉曰汝宜往修厥官以陟華近

程宏遠太常博士制

奉常有博士所以議國家之禮定公卿之謚名鬼神之祠也爾學耕文獲馳譽校官曲臺者峻秀之地往遊其間可不勉哉

王剛中轉朝散大夫制

有司嚴考課之法積四載而應條從臣獲異等之恩損一年而增秩合堯舜之陟典皆祖宗之茂規具官某以經綸之學而審是乎羲農以雅健之文而朋休乎燕許再光禁路即長春官青瑣黃扉所冀回天之力白麻丹

詔可期擲地之聲茲諏律以進階匪詣曹而齋闕雖媿
尊賢之道實存厲世之公往服寵榮益崇聞望

郭振捧日天武四廂都指揮使制

遠人不服肆烈燄以方張莫府摧堅喜捷音之為倡可
無褒典用賁中權具官某識貫戎弢名高勇爵撫鳴劍
而抵掌久抱壯圖援枹鼓則忘身獨潛忠槩茲率千廬
之衛往屯六合之城會兵氣之結蟠涉長淮而侵軼惟
時爪士首奏膚公鶴唳風聲已挫鋒銳之銳席卷霆奮

遂增貔虎之威武表轅門之勲俾冠廟部之職佇期掃蕩嗣有龍光

崔臯正任觀察使制

邊塵入塞方議益兵莫府論功首聞禽敵宜盼襄渥以寵戰多具官某自負鷙強咸推臯俊陳師鞠旅久厲節於轅門折馘執俘屢書名于露版茲出千廬之衛往屯六合之城會兵氣之結蟠涉長淮而侵軼惟時名將獨奮精忠冒白刃以前驅揮公予而麇關果能陷陣致彼

退師已標勇爵之勲特峻廉車之賞益思報効嗣有恩
光

唐閔司封員外郎制

冢卿之屬其司七閭者併省司勲故主爵兼兩曹之事
用得其材則吏無並緣之姦人無稽滯之歎爾行安節
和恬於榮進為郎則未久也躋之前列合乎公言往殫
厥心以振其職

知天台縣王琰轉官再任制

天台之民件汝治行願復借留三年守臣考其實以聞
吾何愛一官而不徇斯民之請也益思盡力以望卓魯

蔣芾起居郎制

國家之用人如工師之用材可楹者不可使為桷可梁
者不可使為椳人物之英絕類離倫則一日九遷人不
議其速錄錄無庸或十年不調人不歎其滯若是則選
授公而衆職修矣爾以文藝登乎甲科以材器久於省
戶國人皆曰爾有荀楊之學有屈宋之文當在華近吾

方陟爾曲臺寘爾詞振而訓辭猶未出也左螭虛位非爾其誰宜為往欽哉以稱吾超拜之意

張進董江遙郡刺史制

熊羆之士不二心之臣立斬將艾旗之功則信賞之行蓋不旋日某有履鋒之勇有徇國之忠茲湖之役涉水力戰執訊獲醜咸犇於率書之盟府陟以州旗益思捐軀用荅恩渥

沈介起復權兵部尚書湖北京西制置使制

屬大事而當一面有鈇鉞之可專見素冠之能三年惟
金革則無辟蓋君子知斷恩之義在先王存變禮之文
我求寶臣起之由次某學廣而足用材高而不羣四禁
代言得上規姚姒之體三銓分職繼前有馬裴之稱治
行著於吳門威靈聳於蜀道事靡不舉人莫能欺適茲
疆場之虞正講甲兵之問顧荆襄之重鎮連江漢之上
游羽扇綸巾賴周瑜之制勝輕裘緩帶謀羊祜以折衝
奪其陟岷之哀授以防邊之筭用尊莫府俾長夏官搃

光黃湓浦之封是為新制集步騎舟師之衆咸稟中權
寵使範以光前期戎翰之善後益攄壯略庸釋遠懷

呂廣問敷文閣待制在京宮觀兼侍講制

朕仰希堯舜三代之風樂聞詩書六經之說厥今帝幃
盡虛講讀之員既得耆儒首真諮詢之列具官某言有
壇宇性守宮庭能習是而勝非故闕中而肆外董狐古
之良史嘗立赤墀伯夷汝作秩宗遂窺紫闥懷章而去
趨節復來陟西清次對之班修金華絕出之業國之治

亂與臧否惟前言往行之師學有緝熙于光明賴博物
洽聞之益往祗茂渥益振榮名

莫延萼銀青光祿大夫檢校太子賓客使持節
南丹州諸軍事南丹州刺史兼御史大夫知南
丹州公事武騎尉制

率土之濱莫非王臣靡私涵覆九州之外謂之蕃國所
貴懷來眷惟卉服之英能慕華風之美承祧有慶錫壤
為榮某浴義浸仁資忠履信心傾葵藿遠輸就日之誠

世受絲綸不闕梯山之貢既處天倫之長宜稱海嶠之雄當茲似續之初賁以便蕃之渥躋銀艾祿臣之秩兼風霜憲府之官擬儲邸之元寮陟勲階之華品併斯徽數為我遐藩噫尊君之道無他主乎恭順撫俗之方有要務在溫慈祇服訓言益綏福嘏

何備權工部侍郎制

朕履位以來勞人是戒苑囿服御無所益敢興土木之謀技巧工匠精其能獨治甲兵之器久虛起部茲得勝

流具官集智略湊於朕前言語妙於天下人瑞有鄭仁
表久侍左坳古事問高仲舒兼司右掖王邨頗談經之
益中臺分典選之權力陳宰路之有連願勾他官而遂
去顧博延於耆舊方自外來難近舍於文儒從其遠引
惟冬卿之非劇雖姻黨而無嫌茲用出綸俾之持橐其
廣立朝之譽益殫致主之忠

王稽中起居舍人制

左右史分主柱下班列甚清直造榻前謀猷可告言動

資其良筆選用在於端人爾古訓積于中而正論發于外不憚大吏風采凜然自臺察而陟望郎錄郎聞而攝記注再盈旬耳即真之命僉曰允哉益思盡瘁以報知獎

楊似循從事郎制

邊鄙有釁勇者當奮其力富者當輸其財而熾嗇成俗體國之風無聞焉爾心不恤緯傾貲助軍增秩出綸夸彼鄰曲

王宣防禦使制

朕志在勸功不與出綸之信醴於用賞每懲刊印之非
具官某趨猛知名朴忠著節出奇設伏夙蘊深謀掩空
擊虛屢彰勳績茲分王旅遠戍邊垂扞襄陽之衝荐聞
吉語嚴樊城之備咸奮聞心用陟兵防式光戎幟益思
吞敵以荅恩章

任天錫左武大夫遙郡防禦使制

西師出塞咸有戰多莫府上功式稽信賞具官某衆推

勁勇自奮忠純執銳披堅久居行陣斬首克敵能立勲
庸用陟遙防仍陞崇品力圖報効嗣有恩光

陳偉節直秘閣制

朕聘召元老尊彊朝廷優禮殊恩寔循舊典爾大丞相
之家子也一經之訓不墜家聲寓直瀛洲用作過庭之
寵

盤洲文集卷二十一

欽定四庫全書

集部

盤洲文集卷二十四

詳校官庶吉士臣初喬齡

主事臣呂雲棟覆勘

總校官編修臣王燕緒

校對官中書臣李斯咏

謄錄監生臣李青燈

欽定四庫全書

盤洲文集卷二十二

宋 洪适 撰

外制四

皇后封贈三代

曾祖吉水簿夏令吉太保制

士有戴仁而行抱義而處其道可以致君具材可以興事而官不過八品職不過黃綬儲休行慶在其後人三

葉之孫遂母天下則寵綏先廟不一褒而已也具官某
行修於身名播于外恬於榮進漫仕下僚積盛德而流
光致柔儀之鼎貴愍書甚寵已躋亞保之班郊需先行
庸正三公之冊營魂不昧勿替引之

曾祖母張氏衛國夫人制

國家廣顯親之孝崇告第之澤外庭之宰輔內掖之妃
嬪皆得追榮其三世矧敵體紫宸齊明義曜者哉某氏
懋徽柔之則秉幽靜之儀德配芳圖克恭蘋澗福流來

裔爰正椒塗茲推泰時之恩大開淇澳之壤祿以象服
疊于幽局

祖穀太傅制

朕登建坤儀助宣王化內有進賢之志歌周南卷耳之
章外無出閫之言矯漢代長秋之敝推慶源之所自酌
愍冊而可行具官某令德藹乎州閭遠識該乎今古有
撥煩理劇之材而不得其位有愛人利物之志而獨善
其身集之慈孫儼乎皇極式衍曾沙之祉孰為幽室之

光出帝傳之卹章寵廟祧之時享尚其歆服益右後昆
祖母孫氏蔡國夫人制

朕稽二祖之聖謨變一陽之元祀蓋乾德嘗避於近晦
淳化始行於上辛茲邊鄙之有興謀著龜而改卜雖神
釐之未受豈邦渙之可留某氏性婉而明教賢以肅四
德章於女憲六嫔講其壺彛婦道顯融罔專鍾郝之美
孫枝盛大遂成陰馬之家申刻蜜之新封表含飴之積
慶具以蔡仲之國用光夏氏之阡

父協太師制

和熹鍾鄧氏之慶不及護羌之存竇后登漢掖之尊已
結觀津之恨茲值邊疆之事未行郊時之儀預出恩章
敢遺戚畹具官某躬履五常之行氣備四時之和抱材
不享於脩年委祉遂綿於後嗣爰有息女以升中宮詠
任如興周之詩監於彤史法春秋褒紀之義禔以師垣
精爽如存寵光無數

母趙氏福國夫人制

孔子叙詩以后妃居三百五篇之首塗山娥嬖姜原任
姒所以助三代之興也今朕得淑哲以隆內治則母氏
之訓可忘乎某氏莊靚凝姿徽柔繕性出自公族分玉
派之餘輝嬪於德人協鳳鳴之吉兆篤生良女遂履純
坤永懷鄰下之慈孰慰宮中之念講陽陔之慶典開長
樂之脂田尚其重泉歆此褒祿

張綬潘景珪賈選大理評事制

廷尉平斷天下之獄而負少事叢慮請讞之稽逗也益

者三人庶無曠職爾等明習律令秋卿以為言往充其
官思踵平廷之美

唐仲友祕書省正字制

劉晏言天下之文惟朋字未正朕既擢爾父於風霜之
地破黨與之私矣爾兄弟鼎立白眉最良發策玉堂奏
篇甚善宜居中祕讎校羣書歸休從容必無異同之論
王時升權兵部侍郎制

朕招延俊乂列布禁途庶幾獻納論思得厭難折衝之

略咨諏謀度聞安民和衆之言顧武部之闕人稽僉諧
而出命具官某秉中庸之德著朴茂之稱版部幹旋合
研桑之心計輔藩撫宇踵龔召之遺風節費用而府有
餘財勤簿領而庭無逋事未奏會稽之最已勞宣室之
思聚天下之兵朕方脩于戎政率夏官之屬爾其治於
軍防式竚良圖用裨上策無使立朝之譽減於作郡之
時

翟貴妃封贈三代

曾祖世俊太子少保制

國家廣追遠之孝崇告第之恩外則三公上及其曾門
內則四妃可覃於初室寵光之渥存沒俱榮其翟方進
之孫班婕妤之祖雍容孝弟之行佩服詩書之言旣抱
器之甚良乃埋光而不耀慶鍾來葉儀次中闈茲逢郊
類之期先漏泉扃之澤惟春宮之亞保蓋朝路之巍班
尚其營魂知此愍冊

曾祖母孫氏齊安郡夫人制

朕郊柴已具邊祲是虞稽皇祖之舊章卜長嬴之首月
預行慶典敢後外姻某氏溫靚呈姿柔明宅志佩悅奉
蒞蘭之獻錡筥絜蘋藻之羞盛德所延後人鼎貴繇八
月良家之選冠四星天極之躔茲以顯親之恩得推節
壤之澤祿之象服錫以脂封迺其有知尚克嘉此

祖思成太子少傅制

朕敷求邦媛光贊坤儀夙有淑聲繼樊衛二姬之行內
無私謁非許史三王之家推厥慶源賁之卹冊某評高

月旦節挺歲寒以利物而存心不逢辰而諸仕宜篤孫
枝之祐遂登妃掖之尊茲有蜜章用光先廟亞于儲傳
祿彼泉途想具如存服之無斃

祖母張氏和義郡夫人制

朕初度郊類已戒先庚之期會有塞氛遂移建已之月
雖神釐之未逆顧邦渙之難稽某氏毓粹名門儷德君
子柔則齊於鍾郝美聲軼於姬姜慶綿再葉之英位冠
四妃之上于治于汙生能繫於蘋蘩如山如河沒遂榮

於翬翟光靈不昧永庇後人

父益太子少師制

天官書中宮天極其間四星大者為正妃餘則後宮之屬也王者求河雎之德卷耳之志者使之宣嬪則而應乾象於是有漏泉之澤及其三世之廟顧於顯考不厚可乎某秉青萍之器挺梗枏之材袖手林泉不得其位篤生淑女遂亞柔坤以孝敬而事慈闈以謙約而諧椒屋六寢之間靡人不稱其以官師之冊祿於幽隴以展

其報親之心嗚呼休哉

母劉氏咸寧郡夫人制

聖善之愛其女以圖史之戒絲枲箴紵之事諄諄焉誨之於鄰下旣黷又笄矣迺見其入禁掖登元妃光大門間豔於戚畹今也服澣濯之衣以六珈副笄歸而壽其親不亦榮乎某氏其儀莊靚其德懿柔祀其先盡執遵之敬事其夫得舉案之恭有女甚賢藹然內範報厥母訓洵出恩章茲裂宜川之疆式開湯沐之邑門楣之語

驗於是矣

吳蓋妻趙氏越國夫人制

朕將燔郊燎偶警邊烽祖武可遵嘗講上辛之卜神心
斯荅宜改長羸之初雖未逆於厖禡爰預行於慶典某
氏儀容莊靚德履肅雍母訓少成循八篇列女之戒壺
彝交播為四姓小侯之師蘋蘩絜絜烝嘗之羞滫瀡謹尊
章之禮如賓有敬偕老則榮茲崇鸞誥之封益示魚軒
之寵越為大國宜爾室家

王述直祕閣宮觀制

冊府上應東壁之躔吾七略羣書充牣棟宇寓其直則
與挾卷拂蟬之士等非象歲月巧宦遊者可得也爾明
經博古嫻於文辭一再超遷駸駸顯列寘之郎位弗安
厥居予之郡符勾閒愈力以其嘗入諫坡故貼以美職
遂其歸心盖吾於言事之臣常委曲其恩意如此

李若川權刑部侍郎都督府參贊軍事制

朕慕孝宣綜核之政推帝舜好生之心念畫地為牢每

虞其輕入故吞舟之網寧失於不經眷求時論之英俾
作秋官之貳景性資閎敏談辯縱橫沛然理劇之材輔
以傳家之學久徊翔於外服甫軒翥於近班治賦版曹
弗籠天下之貨贊籌督府能寢淮南之謀身雖在於戎
亭位不虛於禁橐解嚴可冀踐職有期五刑之屬三千
在成康而能厝一歲之獄數萬惟于張而不寃致吾空
圖之隆賴汝立朝之效

張運知廣州制

二廣之區五羊最大藥洲蒲澗民有嬉遨之風龍戶馬
人政以撫柔為上得此良翰起之叢祠具官某蘊盤錯
之材去表襮之飾法家讞獄解密網之秋荼禁路理財
腐太倉之紅粟把麾而去歌袴可嘉念南服甚遠於朝
廷故連率每艱其印綬儻風移俗易令孚黃木之灣則
水宿山行害去綠林之盜往副朕指益殫厥心

陳正同贈四官制

朕禮優法從恩篤臣鄰晚節挂冠已徇歸田之請一朝

易簣宗興移壑之嗟爰有卹章告其居第具官某風槩
方整機猷碩膚蚤騰譽於峻岐遂致身於榮路貳秋卿
之禁橐知勝殘去殺之仁承天旨於籌帷有排難解紛
之助把麾而去歌袴甚休忽驚垂盡之言空軫云亡之
悼增之四秩飾彼九京沒而有知歆此無數

潘景直祕閣致仕制

大夫七十而請老古之制也近人耽祿廼鐘鳴漏盡而
不知止吁可歎哉具官某學道洗心聲中其實蚤入京

都垂上華輟晟府典樂祿臣司光皆當時之遴選退休
林壑亦既有年遺榮抽簪無玷終始中祕之直非賢弗
居光爾桑榆用迎壽嘏

李璿常仲循資制

爾淪胥異域久厭腥羶挺然來歸亦著功效進秩有命
夸組和門益思盡忠用答天渙

僉書樞密院錢端禮封贈三代

曾祖暄秦國公制

錢氏有德於吳越之民上天祐之宋興二百年間枝胄
蕃衍重龜襲紫為搢紳望族運籌帷幄祖孫相繼發祥
錫美厥有自來具官某得傳家之學蘊邁俗之材入聯
禁途分司會之劇職出顯方面暢柔遠之英規搢紳高
具令名史策紀其遺懿惟厥顯考光輔兩朝迄今三葉
復登宥地天之報施可驗不誣大師維垣已崇懿典四
塞之國載錫蜜章是為有後之光益篤無窮之祉

祖駙馬都尉景臻大寧郡王制

宋有天下凡將相之子勲貴之家以選而為副車者無
慮數十百人雖公圭將鉞生極其榮而甲第綺襦代襲
豪侈求其來裔卓爾不羣秉樞筦政光於三階者未之
有也具官某永昭陵之禁鬻異姓王之聞孫謙畏慈仁
白圭無玷享沁園之奉而有聲于戚畹傳金籙之學而
善訓其後人宜有孫枝致身兩地世德之懿瞻前無鄰
爵秩既尊疊祿泉壤燾以新社隰為樂郊尚其如存服
我休命

父忱慶國公制

昂霄之木不生於培塿之丘縱壑之魚不出於蹄涔之
水公侯之子孫踵前人之盛烈受高門之美蔭奮然有
立為國光輝者所憑厚也具官某天姬之嗣休有德名
樂善履謙白首不變教忠之訓咸仰義方陟我機廷實
爾賢息延登之始飾祿有常表其流光昨國于慶式增
廟祐之寵且慰烝嘗之思

妻高氏和政郡夫人制

劉向採取詩書所載賢妃烈婦興國顯家可法則者為
烈女傳後之秉直筆者莫不紬彤管之書序鵲巢之德
以足一代之史蓋婦人不出房閨美聞於姻黨則名達
於州閭至於垂之竹帛自微以至著非一朝一夕之力
也某氏桃姿蘭行華閨之英雖有姬姜孰佐君子至于
掌樞輦翟之封以榮鸞誥岷峨之壤載啓脂田享其偕
老之榮益修內助之德

左僕射陳康伯祖居仁越國公制

朕霖雨之思賢佐復正台衡舟楫之濟巨川遂彊國勢
擅帳變發蒙之語邊氓諧咽哺之歡式衍慶源用覃先
廟具官某仁義根於心術孝友得之天姿懷利器而不
施彩華纓而漫仕惟邦之傑實爾之孫祿以維垣厥封
康叔之國賁之新冊大開勾踐之疆音徽不遐尚克嘉
此

范成大祕書省正字制

瀛洲英俊之躔也中興以來未有父子踵相躡者爾學

瞻而文縟並美于前人益觀異書以正魚魯之謬

吳總右朝奉大夫制

西師出塞日闕故疆中禁疏恩用酬茂績爾頃居莫府
辦治文書靡監夙宵軍行有賴第勞增秩少示寵光益
思竭忠以濟勲闕

邵及之福建運判制

分道置使民之休戚係焉自昔用人或私其黨朕比下
令必對於文陛然後命之蓋敷奏以言明試以功之意

以爾吏能可取治郡有聲予節閩川廷無異論故使汝
便道奏事而絲綸不憚於先出也戢吏惠民轉輸不絕
俾七郡無不革之弊乃稱澄清之職

鞏衍大理正制

朕慮法吏吹毛不循三尺棘寺之屬詳於用人爾決讞
之久以文母害其聽獄成思繼平反之美

戶部侍郎朱夏卿父勝非魯國公制

魯人類帝用驛剛於上辛漢代祀天歌朱明之雅樂朕

稽前王之成憲遵烈祖之舊章偶四鄙之多虞變一陽
之大禮先斂中壇之福廣為幽窅之光具官某名聞華
夷功在社稷再安國步扶日轂於天衢具赫民瞻應星
符於台路有嗣賢之分鼎貳禁密而筭鞭慰其陟岵之
思出此漏泉之澤不改師垣之祿大開闕里之封尚其
英靈歆此愍飾

兵部尚書沈介故母莫氏贈碩人制

人子有吹棘之難創鉅痛深頃步不忘哀感惟金革之

事起之于服舍則先王許其變禮蓋移孝作忠不以家事辭王事也某氏四德兼全六嫔所則相其夫猶樂羊之室仁其子得鳴鳩之風茲因邊鄙之虞奪爾執喪之嗣郊丘有需少塞沉憂音徽不遐知有卹冊

又所生母阮氏贈碩人制

漢文帝以黃龍見成紀始下詔議郊祀禮官曰古者天子夏親祀上帝於郊迺以四月幸雍祠五畤今朕以邊事展期蓋亦有合于古也某氏其性婉淑其儀莊靚迺

生令子為時顯人入從出藩已盡立身之美冬溫夏清
莫酬養志之誠式慰孝思用推愍典毋慈如在尚克享
之

盤洲文集卷二十二